

摘藻堂四庫全書薈要

集部

欽定四庫全書薈要卷一萬五千四百二

集部

簡齋集卷十一

宋 陳與義 撰

詩

元日

五年元日只流離  
楚俗今年事事非  
後飲屠蘇驚已老  
長乘舴艋竟安歸  
攜家作客真無策  
學道刳心却自違  
汀草岸花知節序  
一身千恨獨霑衣

別大光

堂堂一年長渺渺三秋澗恍然衡山前相遇各白髮歲  
窮窗欲霰人老情難竭君有杯中物我有肝肺熱飲盡  
不能起交深忘事拙乾坤日多虞遊子屢驚骨衡陽非  
不遙雁意猶超忽一生能幾回百計易相奪滔滔江受  
風耿耿客孤發他夕懷君子岩間望明月

道中

雨子收還急溪流直又斜迢迢傍山路漠漠滿林花破

水雙鷗影掀泥百草芽川原有高下隨處著人家

金潭道中

晴路籃輿穩舉頭閒望賒前岡春泱泱後嶺雪槎牙海  
內兵猶壯村邊歲自華客行驚節序回眼送桃花

絕句

野鴨飛無數桃花濕滿枝竹輿鳴細雨山客有新詩

甘棠道中

笋輿礙石一悠然正月微風意已便桃花向來渾不數

山中時見絕堪憐

將至杉木鋪望野人居

春風漠漠野人居若使能詩我不如  
數株蒼檜遮官道  
一樹桃花映草廬

曉發杉木

古澤春光淡高林露氣清  
紛紛世上事寂寂水邊行  
客子凋雙鬢田家自一生  
有詩還忘記無酒却思傾

先寄邢子友

作客經年樂有餘  
邵陽岐路不崎嶇  
山川好處歌紗帽  
桃李香中度笋輿  
欲見舊交驚歲月  
剩排幽語說艱虞  
人間書疏非吾事  
一首新詩未可無

立春日雨

衡山縣下春日雨  
遠映青山綠樣斜  
容易江邊欺客袂  
分明沙際濕年華  
竹林路隔生新水  
古渡船空集亂鴉  
未暇獨憂巾一角  
西溪當有續閑花

正月十二日至邵州十三日夜暴雨滂沱

邵州正月風氣殊鶉尾之南更山塢昨日已見三月花  
今夜還聞五月雨牋與天公一破顏走避北狄趨南蠻  
夢到龍門聽澗水覺來檐溜正潺潺

初至邵陽逢入桂林使作書問其地之安危

湖北彌年所長沙費月餘初為邵陽夢又作桂林書老  
矣身安用飄然計本疎管寧遼海上何得便端居

舟泛邵江

老去作新夢邵江非舊閨灘前羣鷺起枕尾川華分落

花棲客鬢孤舟溯歸雲快然心自足不獨避囂紛

過孔雀灘贈周靜之

海內無堅壘天涯有近親不辭供笑語未慣得殷勤舟楫深宜客溪山各放春高眠過灘浪已寄百年身

江行晚興

曾聽石樓水今過邵州灘一笑供舟子五年行路難雲間落日淡山下東風寒烟嶺叢花照夕灣羣鷺盤生身後聖哲隨俗了悲歡淹旅非吾病悠悠良足歎



夜抵貞牟

野暝猶聞遠川明不恨遲焚山隔岸火及我繫船時夜  
半青燈屋籬前白水陂殷勤謝地主小築欲深期

晚步

畎畝意不釋出門聊散憂雨餘山欲近春半水爭流衆  
籟夕還作孤懷行轉幽溪西篁竹亂微徑雜歸牛

雨

雲物淡清曉無風溪自閒柴門對急雨壯觀滿空山春

發蒼茫內鳥鳴篁竹間兒童笑老子衣濕不知還

今夕

今夕定何夕對此山蒼然偷生經五載幽意獨已堅微  
陰拱衆木靜夜聞孤泉唯應寂寞事可以送餘年

暝色

殘暉度平野列岫圍青春柴門一枝筇日暮棲心神暝  
色著川嶺高低鬱輪囷水光忽到樹山勢欲傍人萬化  
原相孚幽子意自新肅肅夜將久空明動邊垠田鶴吟

相應我獨無荒鄰短篇不可就所寄聊一伸

貞牟書事

留侯辟穀年漢鼎無餘功子真策不售脫迹市門中  
神仙非異人由來本英雄撫世獨餘事用舍何必同  
眷茲貞牟野息駕吾其終蒼山雨中高綠草溪上豐  
仲春水木麗禽鳴清晝風禍福兩合繩既解一身空  
榮華信非貴寂寞亦非窮

山中

當復入州寬作期人間踏地有安危風流丘壑真吾事  
籌策廟堂非所知白水春陂天淡淡蒼峰晴雪錦離離  
恰逢居士身輕日正是山中多景時

入城

舴艋沂溪來款段踏山去入城緣底事要識崎嶇路  
稻塍白縱橫茅嶺青盤互牧兒歌不休孤客自多懼  
士行猶運甓文公亦習步我敢忘艱難衝烟問荒渡

謝主人

春禽勸我歸主人留我住一笑謝主人我自無歸處擬  
借溪邊三畝春結茅依樹不依隣伐薪正可煩名士分  
米何須待故人

羅江二絕

荒村終日水車鳴陂北陂南共一聲洒面風吹作飛雨  
老夫詩到此間成

山翁見客亦欣然好語重重意不傳行過竹籬逢細雨  
眼明雙鷺立青田

洛頭書事

綸巾古鶴氅日暮櫺林間誰使翁迎客應聞屐響山占  
年又得熟勸我不須還村酒困壯士水風吹醉顏

三月二十日聞德音寄李德升席大光新有召

命皆寓永州

塵隔斗牛三月餘德音再與萬方初又蒙天地寬今歲  
且掃軒窗讀我書自古安危關政事隨時憂喜到樵漁  
零陵併起扶顛手九廟無歸計莫疎

夏夜

遠遊萬事裂獨立數峰青  
明月照山木荒村饒夜螢  
翻雲度漢歷歷水浮星  
遙舍燈已盡幽人門未扃

題東家壁

斜陽步屨過東家  
便置清尊不煮茶  
高柳光陰初罷絮  
嫩鳬三羽欲成花  
羣公天上分時棟  
閒客江邊管物華  
醉裏吟詩空跌宕  
借君素壁落栖鴉

曳杖

柳條一何長我髮一何短餘日會有幾經春卧荒曠曳  
杖陂西去悠然寄蕭散田隴粲高低白水一時滿農夫  
暮猶作媿我讀書嬾且復棄今茲前峰青巉巖

雷雨行

憶昨炎正中不融元帥仗鉞臨山東萬方嗷嗷叫上帝  
黃屋已照睢陽宮嗚呼吾君天所立豈料四載猶服戎  
馬巡會稽不到海未省駕舶觀民風定知諫諍有張猛  
不可危急無高共自古美惡周必復兵戈汝莫窮妖凶



吉語四奏元氣通德音夜發春改容雷雨一日遍天下  
父老感泣霑其胸臣少憂國今成翁欲起荷戈傷疲癯  
小遊太一未移次大樹將軍莫振功劉琨祖逖未足雄  
晏球一戰烟塵空諸君努力光竹素天子可使塵常蒙  
君不見夷門山頭虎復龍向來佳氣元葱葱

開壁置窗命曰遠軒

鍾妖鳴吾傍楊獠舞吾側東西俱有礙羣盜何時息丈  
夫堂堂軀坐受世褊迫仙人千仞岡下視笑予厄誰能

久鬱鬱持斧破南壁窗開三尺明空納萬里碧岩霏雜  
川靄奇變供几席誰見老書生軒中岸玄幘蕩漾浮世  
裏超遙送茲夕倚楹發孤嘯呼月出荒澤天公亦粲然  
林壑受珠璧會有鶴賀賓經過來見客

再賦

清曉坐南軒望山頭屢側居士亦豈痴飛雲方未息樂  
哉此遠俗亂世免怵迫那知百戰禍豈識三空厄閉門  
美熟睡開門瞻翠壁遠客謝主人分此一窗碧新晴鳥

鳴簷微暑風入席蕭然此白首豈更冒朝噴誓將老茲  
地不復數晨夕但恨食無肉臞仙出山澤蟄雷轉空腸  
吐句作圭璧一笑示隣家向來無此客

又賦

我昨在衡山傷心衢路側豈知得此地一坐數千息易  
安生痛定過美出飢迫誓言如齊侯常戒在莒厄要將  
萬里身獨面九年壁如何不已奈開窓玩霏碧招呼面  
前山浮翠落衾席一笑等兒戲都忘雪侵幘人生何不

娛今夕定何夕向來萬頃胸餘地吞七澤念此亦細事  
未遽瑕生璧聊使山中人永記山下客

傷春

廟堂無策可平戎坐使甘泉照夕烽初怪上都聞戰馬  
豈知窮海看飛龍孤臣霜髮三千丈每歲烟花一萬重  
稍喜長沙向延閣疲兵敢犯虎狼鋒

題水西周三十三壁二首

下管先生巾欲摧雨中艇子便撐開青山隔岸迎人去

白鷺衝烟送酒來

周子芻中早得春  
喚人同度一溪雲  
貪看雨歇前峰變  
不覺斟時已十分

山齋二首

夏郊綠已遍  
山齋晝自遲  
雲物忽分散  
餘碧暮逶迤  
寒暑送萬古  
榮枯各一時  
世紛幸莫及  
我廬得常持

雖愧荷鋤叟  
朝來亦不閒  
自剪牆角樹  
盡納溪西山  
經行天下半  
送老此窗間  
日暮烟生嶺  
離離飛鳥還

散髮

百年如寄亦何為散髮清狂未足非南澗題詩風滿面  
東橋行藥露霑衣松花照夏山無暑桂樹留人我豈歸  
藜杖不當軒蓋用穩扶居士莫相違

六月六日夜

蘊隆豈不壞涼氣亦徐還獨立清夜半疎星蒼檜間晦  
明莽相代天地本長閒四顧何寥落微風時動關

六月十七日夜寄邢子友

暑雨雖不足涼風還有餘樂此城陰夜何殊山崦居月  
明蒼檜立露下芭蕉舒試問澄虛閣今夕復焉如

觀雨

山客龍鍾不解耕開軒危坐看陰晴前江後嶺通雲氣  
萬壑千林送雨聲海壓竹枝低復舉風吹山角晦還明  
不嫌屋漏無乾處正要羣龍洗甲兵

寄大光二絕句

心折零陵霜入鬢更脩短札問何如江湖不是無來雁

只慣平生作報書

芭蕉急雨三更鬧  
客子殊方五月寒  
近得會稽消息否  
稍傳荆渚路岐寬

村景

黃昏吹角聞呼鬼  
清曉持竿看牧鵝  
蚕上樓時桑葉少  
水鳴車處稻苗多

諫議遺踪尚可望  
曳裾不必效鄒陽  
但修天爵要人爵  
始信書堂即玉堂



水車

江邊終日水車鳴我自平生愛此聲  
風月一時都屬客杖藜聊復寄詩情

山居二首

點檢行年書閱閱山中共賦幾篇詩  
如今未有驚人句更待秋風上桂枝

宅圖不必煩秋令已卜東坡澗水邊  
更與我為燒藥竈只愁君要買山錢

簡齋集卷十一

謹案卷八第三頁後四行菊花紛四野原本四訛  
世據宋詩鈔改

卷九第二頁前六行龜鼉襍怒爭新穴原本穴訛  
月據宋詩鈔改

第五頁前四行欲題文字弔古昔原本昔訛今據  
別本改

卷十第五頁後二行復從華容道烏沙還郡原本  
從訛從據別本改

第五頁後三行夜半出小江口宿馬原本出訛坐  
據別本改


卷十一第一頁後四行飲盡不能起原本能起訛  
起能據宋詩鈔改

第五頁前八行萬花原相享原本享訛尋據別本  
改

第十一頁前六行涼氣亦徐還原本氣訛風據別  
本改

第十一頁前八行十七日夜寄邢子友原本闕夜  
下四字據別本補





總校官庶吉士臣張能照

校對官庶吉士臣陳墉

謄錄監生臣吳魯

欽定四庫全書薈要

集部

簡齋集卷十

二至  
五

詳校官助教臣謝登雋





欽定四庫全書薈要卷一萬五千四百三

集部

簡齋集卷十二

宋 陳與義 撰



拜詔

紫陽山下聞皇牒  
地藏階前拜詔書  
乍脫綠袍山色翠  
新披紫綬佩金魚

別諸州二首

金匱要略卷十二  
風送孤蓬不可遮山中城裏總非家臨行有恨君知否  
不見籬前稻著花

隴雲知我欲船開飛過江東還復回不似周顒趨闕去  
山靈因許却歸來

寄德升大光

君王憂詔起羣公也置樵夫尺一中易著青衫隨世事  
難將白髮犯秋風共談太極非無意能繫蒼生本不同  
却倚紫陽千丈嶺遙瞻黃鵠九霄東

題向伯共過峽圖二首

旌旗翻日淮南道興罷歸來雪滿船  
正有佛光無處著獨將佳句了山川

過峽新圖世所傳峽中猶說泛舟仙  
柱天勲業須君子借我茅齋看十年

題趙少尹清白堂三首

小謝為州不廢詩庭中草木有光輝  
一林風露非人世更著梅花相發揮

使君堂上無俗客白白青青兩勝流添得吟詩老居士  
千年一笑澤南州

雪裏芭蕉摩詰畫炎天梅蕊簡齋詩他時相見非生客  
看倚琅玕一段奇

次韻邢九思

百年鼎鼎雜悲歡老去初依六祖壇玄晏不堪長抱病  
子真那復更為官山林未必容身得顏面何宜與世看  
白帝高尋最奇事共君盟了不應寒

遙碧軒作呈使君少隱時欲赴召

我本山中人尺一喚起趨埃塵君為邊城守作意邀山  
入窗牖朝來爽氣如有期送我憑軒一杯酒丈夫已忍  
猿鶴羞欲去且復斯須留西峯木脫亂髮擁東嶺烟破  
脩眉浮主人愛客山更好醉裏一笑驚蠻州丁寧雲雨  
莫作厄明日青山當逐客

石限病起

幽人病起山深處小院鴉鳴日午時六尺屏風遮晏坐

一簾細雨獨題詩

同范直愚單騎遊浯溪

瀟湘之流碧復碧上有鉄立千尋壁河朔功就人與能  
湖南碑成江動色文章得意易為好書雜矛劍天假力  
四百年來如創見雷公雨師知此石小儒五載憂國淚  
杖藜今日溪水側欲搜奇句謝兩公風作浪湧空心惻

愚溪

小閣當喬木清溪抱竹林寒聲日暮起客思雨中深行

李妨幽事欄干試獨臨終然遊子意非復昔人心

已酉中秋之夕與任才仲醉于岳陽樓上明年  
十一月二十日南遊過道謁姜光彥出才仲  
畫軸則寫是夕事也剪燭觀之恍然一笑書  
八句以當畫記

去年中秋洞庭野寒瑤萬頃兼天瀉岳陽樓上兩幅巾  
月入欄干影瀟洒世間此影誰能孤狂如我友人所無  
一夢經年無續處道州還見倚樓圖

題道州甘泉書院

甘泉坊裏林影黑吳氏舍前書榜鮮牀座略容摩詰借  
桂枝應待小山傳兵橫海內尤紛若風到湖南還穆然  
勉效周生述孔業賦詩吾獨愧先賢

度嶺

年律將窮天地溫兩州風氣此橫分已吟子美湖南句  
更擬東坡嶺外文隔水叢梅疑是雪近人孤嶂欲生雲  
不愁去路三千里少住林間看夕曛



遊秦岩

秦岩昧舊聞勝會非復常異哉五里祕發此一日狂篝  
燈破大陰拄杖入仙鄉散途楊梅實承磴茁茁房石液  
白瑤墮泉氣青霓翔度危心欲動逢衍興未央眩人黝  
谷深覆我翠極長降登窮田壠開闔到鞠場龍遮側岸  
路猶護高廩藏力士到履空應真儼成行碾缺神所吝  
悵空仙莫量水鳴沈寥內崖立森羅傍語聞受遠響力  
極生微陽夢中出小竇立處忽大荒塵緣信深重仙事

豈渺茫靈武唐業開湘濱耀文章望夷秦政壞嶺底畏  
禍殃隱顯非士意安危存國綱且復置此事更將適何  
方賦詩意未愜吾欲栖僧廊

戲大光送酒

折得嶺頭如玉梅對花那得欠清盃不煩白水真人力  
便有青州從事來

次韻謝呂居仁居仁時寓賀州

別君不覺歲時荒豈意相逢魑魅鄉篋裏詩書摠寥落

天涯形貌各昂藏江南今歲無征戰嶺表窮冬有雪霜  
尚可卜隣我欲住草茅為蓋竹為梁

舟行遣興

會稽尚隔三千里臨賀初盤一百灘殊俗問津言語異  
長年為客路岐難背人山嶺重重去照鷓梅花樹樹殘  
酌酒枕樓今日意題詩船壁後來看

康州小舫與耿伯順李德升席大光鄭德象夜  
話以更長愛紅燭為韻得更字

萬里衣冠京國舊一船風雨晉康城燈前顏面重相識  
海內艱難各飽更天濶路長吾欲老夜闌酒盡意難傾  
明朝古峽蒼烟道都送新愁入櫓聲

與大光同登封州小閣

去程欲數莽難知三日封州更作遲青嶂足稽天下士  
錦囊今有嶠南詩共登小閣春風裏回望中原夕靄時  
萬本梅花為我壽一杯相屬未全痴

登海山樓

萬航如鳬驚一水如虛空此地接元氣壓以樓觀雄我  
來自中州登臨眩冲融白波動南極蒼鬢承東風人間  
路浩浩海上春濛濛遠遊為兩眸豈惜勞我躬仙人欲  
我語薄暮山蔥蘢海清無蜃氣彼固蓬萊宮

次韻大光五羊待耿伯順之作

康州艇子來不急過岸櫓聲空復長百尺樓頭堪望遠  
淡烟斜日晚荒荒

雨中再賦海山樓詩

百尺欄干橫海立一生襟抱與山開岸邊天影隨潮入  
樓上春容帶雨來慷慨賦詩還自恨徘徊舒笑却生哀  
世間猛士今安在非復當年單父臺

題長樂亭

遠山雲迷顛近山淨如沐客子曳竹輿咿啞過山麓我  
行一何遲時序一何速東風所經過林水一時綠疎雨  
忽飛墮聲在道邊木淑氣自遠歸光景變川陸遙知存  
存子明亦戒征軸霽色雖宜詩不見此清穆

和大光道中絕句

已費天公十日晴  
今朝小雨送潮生  
轉頭雲日還如錦  
一抹蔥蘢畫不成

又和大光

寂寂孤村竹映沙  
檳榔迎客當煎茶  
嶺南二月無桃李  
夾路松開黃玉花

題長岡亭呈德升大光

久客不忘歸如頭垢思沐身行江海濱  
夢繞嵩山麓馬

何預得失鵬何了淹速匣中三尺水瘴雨生新綠胡為  
古驛中坐聽風吟木既非還吳張亦異赴洛陸兩公茂  
名實自是宜鼎軸發發不可遲帝言頻郁穆

甘棠驛懷李德升席大光

破驛難並休差池便薪水山川會心地還思對君子道  
邊千尺榕午蔭清且美極知非世用我愛不能已東風  
吹南服莽莽綠萬里此地亦可耕胡為爾予趾

贈漳州守綦叔厚



過盡蠻荒興復新  
漳州畫戟擁詩人  
十年去國九行旅  
萬里逢公一欠伸  
王粲登樓還感慨  
紀瞻赴召欲逡巡  
繩床相對有今日  
賸醉齋中軟脚春

宿資聖院閣

暮投山崦寺高處  
絕人羣遠岫林間  
見微泉舍後聞閣  
虛雲亂入江濶野  
橫分欲與僧為記  
今年懶作文

題大瀧湫

曉行蒼壁中窮處  
乃高崖白龍三百  
丈欲下層顛來映

日灑飛雨繞山行怒雷潭影納浩蕩雲氣扶崔嵬小儒  
歎造化辨此何雄哉亦知天下絕尊者所徘徊三生清  
淨願俗緣故難開踐勝吾豈敢稽首倘興哀

雨中宿靈峰寺

雁蕩山中逢晚雨靈峰寺裏借繩床只應護得綸巾角  
還費高僧一炷香

自黃岩縣舟行入台州

宴坐峰前衝雨急黃岩縣裏借舟遲百年痴點不相補

萬事悲歡豈可期  
莽莽蒼波兼宿霧  
紛紛白鷺落山陂  
只應江海淒涼地  
欠我臨風一賦詩

過下盃渡

夜宿下盃館  
朝鳴一棹東  
湖平天盡落  
峽斷海橫通  
冉冉雲隨舸  
茫茫鳥遡風  
仙人蓬島上  
遙見我乘空

王孫嶺

已過長溪嶺  
更危伏龍莽  
莽向川岳斜  
陽照見林中石  
記得南山隱  
去時

泛舟入前倉

曾鼓鹽田棹前倉不足言盡行江左路初過浙東村春  
去花無迹潮歸岸有痕百年都幾日聊復信乾坤

送熊博士赴瑞安令

衣冠衮衮相逢處草木蕭蕭未變時聚散同驚一枕夢  
悲歡各誦十年詩山林有約吾當去天地無情子亦飢  
笑領銅章非失計歲寒心事欲深期

病中夜賦

抱病喜清夜形羸心獨開不知藥鼎沸錯認雨聲來  
晚燈燭麗天長鴻雁哀書生惜日月欹枕意茫哉

喜雨

秦望山頭雲昨日鸞鳳舉冥冥萬里風淅淅三更雨  
小臣知君憂起坐聽簷語風力有去來龍工雜文武  
燈花識我意一笑相媚嫵泥翻早朝路瀾瀾光欲吐  
鬱然蒼龍闕佳氣接南畝千官次第來豫色各眉宇  
記事以短篇不工還自許

醉中

醉中今古興哀事詩裏江湖搖落時  
兩手尚堪盃酒用寸心唯是鬢毛知  
稽山擁郭東西去禹穴生雲朝暮奇  
萬里南征無賦筆茫茫遠望不勝悲

不見梅花六言

荆楚歲時經盡今年不見梅花想得  
蒼烟玉立都藏江上人家

梅花二首

鐵面蒼髯洛陽客玉顏紅領會稽仙街頭相見如相識  
恨滿東風意不傳

畫取維摩室中物小瓶春色一枝斜夢回映月窗間見  
不是桃花與李花

雨

聽雨披衣襟冲雨踏晨鼓萬珠落笋輿詩中有新語老  
龍經秋卧歲暮始一舉成功亦何遲光彩變蔬圃道邊  
聞井溢可笑遽如許舊山百尺泉不知旱與雨

瓶中梅

明窗淨几玉立耿無鄰紅葉兩重袂殷勤滿面春曾  
為庾嶺客本是洛陽人老我何顏貌東風處處新

除夜

疇昔追歡事如今病不能等閒生白髮耐久是青燈海  
內春還滿江南硯不冰題詩餞殘歲鐘鼓報晨興

雨中

北客霜侵鬢南州雨送年未聞兵革定從使歲時遷古



澤生春靄高空落暮鳶山川含萬古鬱鬱在尊前

簡齋集卷十二

欽定四庫全書薈要卷一萬五千四百四

集部

簡齋集卷十三

宋 陳與義 撰

詩

渡江

江南非不好楚客自生哀  
搖櫂天平渡迎人樹欲來  
雨餘吳岫立日照海門開  
雖異中原險方隅亦壯哉

夙興

美哉木枕與菅席無禁當與戴朝幘巷北巷南聞鍛聲  
舍後舍前唯月色事國無功端未去竹與伊軋猶昨日  
不見武陵城裏事繁華夢覺生荊棘成敗由來幾古今  
乾坤但可著山澤西湖已無金碧麗雨林晴粧尚娛客  
會當休日一訪之塵沙蒼蘚慰崖石只恐冷泉亭下水  
發明白髮增嘆息

幽窗

貧士工用短壯夫溺于詩破壁為幽窗我筆還得持高

鳥度遺影風靡語移時迨我休暇日與物聊同嬉古來  
賢哲人畎畝策安危一行或大謬半隱良亦痴寄言山  
中友即歲以為期

題伯時畫溫溪心等貢五馬

漠漠河西塵幾重年來畫馬亦難逢題詩記著今朝事  
同看聯翩五匹龍

休日馬上

休日不自休騎馬踏荒徑却扇受景風今朝我無病春

雲閣晨曜羣綠淡相映山川與朝市一動自一靜九衢  
行萬人誰抱此懷勝不得與之語蕭蕭寄孤詠

題畫

分明樓閣是龍門亦有溪流曲抱村萬里家山無路入  
十年心事與誰論

題崇蘭圖二首

兩公得我色敷腴藜杖相將入畫圖我已夢中多識路  
秋風舉袂不踟躕

奕奕天風吹角巾松聲水色一時新山林從此不牢落  
照影溪頭共六人

秋夜獨酌

涼秋佳夕天氣廓河漢之涯秋漠漠月出未出林彩變  
幽人露坐方獨酌自歌新調酒如空天星下飲觥船中  
忽思李白不可見夜半喬木搖西風百年佳月幾今夕  
憂樂相尋老來疾瓊瑤滿地我影橫添酒賦詩何可失

九日示大圓洪智

自得休心法悠然不賦詩忽逢重九日無耐菊花枝

劉大資挽詞二首

天柱歌傾日堂堂墮急圍遂聞王蠋死不見華元歸一  
代名超古千年泪染衣當時如有繼猶足變危機

一死公餘事由來彼亦人使知臨難日猶有不欺臣河  
洛傾遺憤英雄嘆後塵煌煌中興業公合冠麒麟

與智老天經堂夜坐

殘年不復徙他鄉長與兩禪同夜釭坐到更深都寂寂



雪花無數落天窗

觀雪

無住菴前境界新  
瓊樓玉宇總無塵  
開門倚杖移時立  
我是人間富貴人

題俞秀才所藏江參山水橫軸二首

卷中衮衮溪山出  
筆下明明開闢初  
不肯一禪為婦計  
俞郎作意未全疎

萬壑分烟高復低  
人家隨處有柴扉  
此中只欠陳居士

千丈岡頭一振衣

小閣晨起

紙帳不知曉鴉鳴吾當興開窗面老松相對寒峻嶒幸  
無公家責欲懶還不能汲井頰我面銅盆旋敲冰梳頭  
風入檻散髮霜滿膺四瞻郊澤間蒼烟慘朝凝却望塔  
顛日光景舒層層乾坤有奇事變化忽相乘客來無可  
語語此不見謦今晨胡牀冷愧我無氍毹

小閣晚望

澤國候易變孟冬乃微和解襟凭小閣日暮歸雲多蒼  
蒼散草木莽莽雜山河荒野蟲亂鳴長空鳥時過萬象  
各無待唯人顧紛羅備物以養已更用干與戈天風吹  
我來衣袂生微波幽懷渺無寄蕭瑟起悲歌

梅花

一枝斜映佛前燈春入銅壺夜不冰昔歲曾遊大庾嶺  
今年聊作小乘僧

得張正字書

送我茅屋低天寒人跡稀一觴尤有味萬事已無機歲暮塔孤立風生鴉亂飛此時張正字書札到郊扉

詠江梅

風雪集歲暮江梅開不遲朝來幽窗底明璫綴青枝上天播淑氣百卉分四時寒村值西子足以昌吾詩

雪

窮臘見三白江南無舊聞天上春已暮盡日花繽紛平生雖畏寒遇雪心所欣擁裘未敢出投隙致殷勤窗戶

忽相照川陵已難分二儀有巨麗老我不能文高吟黃  
竹詩薄暮心無垠浮屠似玉笋突兀倚重雲

小閣

闌干橫歲暮徙倚度陰晴木落太湖近梅開南紀明病  
餘仍愛酒身後更須名鸛鶴忽雙起吾詩還欲成

元夜

今夕天氣佳上天何澄穆列宿雨後明流雲月邊速空  
簷垂斗柄微吹生叢竹對此不能寐步繞庭之曲遙睇

浮屠顛數星紅煜煜悟知燒燈夕節意亦滿目歷代能  
幾詩遍賦雜珉玉栖鴉亦未定更鳴伴余獨百年滔滔  
內憂樂兩難復唯應長似今寂寞送寒燠

懷天經智老因訪之

今年二月凍初融睡起茗溪綠向東客子光陰詩卷裏  
杏花消息雨聲中西菴禪伯還多病北柵儒先只固窮  
忽憶輕舟尋二子綸巾鶴氅試春風

黃脩職雨中送芍藥五枝

微雨濕清曉老夫門未開煌煌五仙子並擁翠蕤來  
脂洗盡不自惜為雨歸來更無力老夫五十尚可痴憑  
軒一賦會真詩

櫻桃

四月江南黃鳥肥櫻桃滿市粲朝暉赤瑛盤裏雖殊遇  
何似筠籠相發揮

葉柗惠花

無住菴中老居士逢春入定不銜盃文殊罔明俱拱手

今日花枝喚得回

牡丹

一自邊塵入漢關十年伊洛路漫漫青墩溪畔龍鍾客  
獨立東風看牡丹

盆池

三尺清池窗外開芙蓉葉底戲魚回雨聲轉入浙江去  
雲影還從震澤來

松棚



黯黯當窗雲不驅不教風日到琴書只今老子風流地  
何似茅山陶隱居

西軒

平生江海志歲暮僧廬中虛齋時獨步遡此西窗風初  
夏氣未變幽居念方冲三日無客來門外生蒿蓬輕陰  
映夕幌窈窕瓶花紅未知古今士誰與此心同

玉堂倬直

庭葉瓏瓏曉更青斷雲度日照寒廳只因未上歸田奏

貪誦楞伽四卷經

病骨

病骨瘦始輕清虛日來入今朝僧閣上超遙久風立茂  
林榴萼紅細雨離黃濕物色乃可憐所悲非故邑

晨起

寂寂東軒晨起時朦朧草木暗疎籬風來衆綠一時動  
正是先生睡足時

登閣

今日天氣佳登臨散腰脚南方宜草木九月未黃落秋  
郊乃明麗夕雲更蕭索遠遊吾未能歲暮依樓閣

芙蓉

白髮飄蕭一病翁暮年身世藥瓢中芙蓉牆外垂垂發  
九月憑欄未怯風

歲華

歲華日已彫飛葉鳴古瓦白頭倚危檻高旻覆平野遙  
瞻疎柳林下有清溪瀉三春既繁麗九秋亦瀟灑平生

萬事過所欠茅一把山川鬱日夕有抱無與寫賦詩老  
不工閑篇詠風雅

得長春兩株植之窗前

鄉邑已無路僧廬今是家聊乘數點雨自種兩叢花籬  
落失秋序風烟添歲華衰翁病不飲獨立到棲鴉

九月八日戲作兩絕句示妻子

今夕知何夕都如未病時重陽莫草草剗作幾篇詩  
小甕今朝熟無勞問酒家重陽明日是何處有黃花

拒霜

拒霜花已吐  
吾宇不淒涼  
天地雖肅殺  
草木有芬芳  
道人宴坐處  
侍女古時粧  
濃露溼丹臉  
西風吹綠裳

微雨中賞月桂獨酌

人間跌宕簡齋老  
天下風流月桂花  
一壺不覺叢邊盡  
暮雨霏霏欲濕鴉

簡齋集卷十三

欽定四庫全書薈要卷一萬五千四百五

集部

簡齋集卷十四

宋 陳與義 撰

詞

無住詞

世傳頃年都下市肆中有道人攜烏衣椎髻  
女子買斗酒獨飲女子歌詞以侑凡九闕皆  
非人世語或記之以問一道士道士驚曰此

赤城韓夫人所製水府蔡真君法駕導引也  
烏衣女子疑龍云得其三而亡其二擬作三

闕

朝元路朝元路同駕玉華君千乘載花紅一色人間遙  
指是祥雲回望海光新

東風起東風起海上百花搖十八風鬟雲半動飛花和  
雨著輕綃歸路碧迢迢

簾漠漠簾漠漠天澹一簾秋自洗玉舟斟白醴月華微



映是空舟歌罷海西流

亭下桃花盛開作長短句詠之

虞美人

十年花底承朝露看到江南樹洛陽城裏又東風未必  
桃花得似舊時紅 胭脂睡起春纔好應恨人空老心  
情雖在只吟詩白髮劉郎孤負可憐枝

五日移舟明山下作

憶秦娥

魚龍舞湘君欲下瀟湘浦瀟湘浦興亡離合亂波平楚  
獨無尊酒酬端午移舟來聽明山雨明山雨白頭孤

客洞庭懷古

又臨江仙

高詠楚詞酬午日天涯節序匆匆榴花不似舞裙紅無  
人知此意歌罷滿簾風萬事一身傷老矣戎葵凝笑  
牆東酒盃深淺去年同試澆橋下水今夕到湘中

大光祖席醉中賦長短句

虞美人

張帆欲去仍搔首更醉君家酒吟詩日日待春風及至  
桃花開後却匆匆歌聲頻為行人咽記著尊前雪明

朝酒醒大江流滿載一船離恨向衡州

紫陽寒食

點絳脣

寒食今年紫陽山下蠻江左竹籬烟鎖何處求薪火

不解鄉音只怕人嫌我愁無那短歌誰和風動梨花朶

邢子友會上

虞美人

超然堂上閒賓主不受人間暑冰盤圍坐此州中却有  
一瓶和露玉芙蓉  
亭亭風骨涼生牖消盡尊中酒酒  
闌明月轉城西照見紗巾藜杖帶香歸

福建道中

漁家傲

今日山頭雲欲舉，青蛟素鳳移時舞。行到石橋聞細雨。  
聽還住，風吹却過溪西去。我欲尋詩寬久旅，桃花落盡春無所。  
渺渺籃輿穿翠楚，悠然處，高林忽送黃鸝語。

予甲寅歲自春官出守湖州，秋杪道中荷花無復存者。乙卯歲自瑣闥以病得請奉祠卜居青墩鎮，立秋後三日行舟之前後，如朝霞相

映望之不斷也以長短句記之

虞美人

扁舟三日秋塘路平度荷花去病夫因病得來遊更值  
滿川微雨洗新秋去年長恨拏舟晚空見殘荷滿今  
年何以報君恩一路繁花相送到青墩

離杭日梁仲謀惠酒極清而美七月十二日晚

卧小閣已而月上獨酌

浣溪沙

送了棲鴉復暮鐘欄干生影曲屏東卧看孤鶴駕天風  
起舞一尊明月下秋空如水酒如空謫仙已去與誰同

青墩僧舍作

三樓春

山人本合居岩嶺，聊問支郎分半境。  
殘年藜杖與綸巾，八尺庭中時弄影。  
呼兒吸水添茶鼎，甘勝吳山山下井。  
一甌清露一爐雲，偏覺平生今日永。

木屏

清平樂

黃衫相倚翠葆層層底，八月江南風日美。  
弄影山腰水尾，楚人未識孤妍離騷。  
遺恨千年無住蒼中新事，一枝喚起幽禪。

重陽

定風波

九日登高有故常  
隨晴隨雨一傳觴  
多病題詩無好句  
孤負黃花今日十分黃  
記得眉山文翰老  
曾道四時佳節是重陽  
江海滿前懷古意  
誰會闌干三撫獨淒涼

荷花

菩薩蠻

南軒對面芙蓉浦  
宜風宜月還宜雨  
紅少綠多時  
簾前光景奇  
繩床烏木几  
盡日繁香裏  
睡起一篇新  
與花為主人

塔院僧閣

南柯子

矯矯千年鶴，茫茫萬里風。闌干三面看秋空。背揜浮屠，  
千尺冷烟中。林塢村村暗，溪流處處通。此間何似玉  
霄峰。遙望蓬萊，依約曉雲東。

夜登小閣憶洛中舊遊

臨江仙

憶昔午橋橋上飲，坐中多是豪英。長溝流月去無聲。杏  
花疎影裏，吹笛到天明。二十餘年如一夢，此身雖在  
堪驚。閒登小閣看新晴。古今多少事，漁唱起三更。



簡齋集卷十四

欽定四庫全書薈要卷一萬五千四百六

集部

簡齋集卷十五

附錄外集

宋 陳與義 撰

詩 銘記 跋 贊

畫梅

蛾眉淡淡自成粧  
驛使還家空斷腸  
脂粉不施憔悴盡  
失身未嫁易元光

竹

高枝已約風為友密葉能留雪作花昨夜常娥更瀟灑  
又攜疎影過窗紗

心老久許為作畫未果以詩督之

布衲王摩詰禪餘寄筆端試將能事迫肯作畫工難秋  
入無聲句山連欲雨寒平生夢想處奉乞小巔巔

偶成古調十六韻上呈判府兼贈劉興州

稽首蘇耽仙乘雲去無迹尚留橘井在與世除狂疾誰  
能不飲此識味亦可錄坐令鄭玄牛亦抱荆山玉偉哉

稚川裔神交接朝夕游戲及小道造化入大筆優為吳  
詩父雅命楚騷僕豈其橘井助本自同仙籙坐中子劉  
子知是當日客書懸元和脚語經建康力先我登公門  
不數鷺鳥百曾挹兩仙袖自然生羽翼嗟我無長才學  
架屋下屋詩雖兩牛腰事亦幾蛇足已窮猶不悔政荷  
師友德文盟倘許予幸不疑籍湜

再用迹字韻成一首呈判府

風雨一葉過黃花已陳迹人貧交舊疎歲暮日月疾貪

人積胡椒智不到鬼錄那知庾郎菜地瘦飽金玉不如  
學服氣清坐了晨夕尚餘烟月債驅使入吟筆晚逢葛  
先生憐我出無僕借車得時詣謬窺文字錄談詩不知  
疲或作夜半客揮毫寫珠玉治郡蓋餘力不羨江千萬  
不慕李八百願傳公句法容我附風翼城東劉子政著  
書方滿屋昨示一篇詩三日嘆未足仍聞供筆硯家有  
樊通德但恐裴公門從此近舍湜

元忠有詩要常謂某  
曰若人有可愛處吾

嘗記書中事不審使之尋孰能知其處詩成  
或使之寫亦往往如人意陳學士願問斯語

蒙示黃磧佳詩三讀欽羨輒繼韻仰報嘉賜

痴兒了官事官事那可訖豈知公偷閒臨水照纓紱雖

微八川雄暴怒常至沸

子虛賦說八川云沸乎暴怒沸音弗

倘或似山陰

清流可共夜貪德實似濟行地不鬱鬱

一作地中

趙洛與陶

丘相比亦彷彿

禹貢濟水于陶丘北也

解后逢公賞一洗伏流屈

可愛不可唾衆議那可拂彼是公餘波本來非俗物

蒙示涉汝詩次韻

城南天倒影綠浪搖十里使君雲夢胸猶復錄此水舟

行及雨霽秋色在葭葦烟涵翠縠潤月照金波委知公  
已忘機鷗鷺宛停峙向來趨熱士說似顙應泚俗子與  
清游自古劇函矢如何有雙脚受垢不受洗異哉公殊  
嗜記此兩苦李詩成墮衡門名字污紙尾公詩賜某及家弟也明  
當躡公迹佳處不待指會逢白沙渚我舍真可徙鳴騶  
倘重來傍舫傾我耳

再和

洪河豈不壯餘潤彌九里海內所詠歌在德不在水德

人經行地可敬及蒲葦況有水如此浪去劇雪委念昔  
涉濤江怒颺如山峙天風怖殺人舟定舷有泚惕然三  
夜夢沙礫下飛矢至今逢溝壑敢照不敢洗忽誦涉汝  
詩五字擬蘇李快言擊汰事想見魚掉尾十年疑此樂  
始誤斗柄指便當策我足歲月忽轉徙未辨志和舟且  
洗子荆耳

游峴山次韻三首

夜度一程雲平明踏山址山神豈妬我飛雨亂眸子重



岳衮衮去前傑後俊偉晦明更百態始望那及此路窮  
得精廬稅駕諮祖始老僧千金意佳處相指示先生一  
笑領得句易翻水安石未歸山却要山料理奇哉此一  
段驚世無前軌酬山以快飲春巖正滋旨一丘倘許予  
高卧飽松髓城中謾拄笏那知有茲事

高人買山隱百萬猶恨少客兒最省事有屐一生了東  
莊良不遙十里望縹緲縈紆並麥壠翠浪四山繞先生  
滯鹿車去程通鳳沼暫來山泉上思與飛雲杳雲北接

雲南一逕絕紛擾竹林懷風雨目斷極窈窕從來無世  
塵相對真不撓龍兒爭地出頭角已表表先生喙支郎  
勿使斤斧天終當乞一杖險路扶吾老

轉路山突兀衆山之所望懶慵不下山揖山會虛堂大  
空出盤嬉小空時侍傍我游瞻鐵鳳力盡隨木羊石窗  
非人世意欲凌風翔嶢嶢窗中人出定髮有霜過眼幾  
浮烟關身一禪床教我安心法入鳥不亂行似知使君  
尊起炷百子香隴雲亦堪寄分作我歸裝好在窗前竹

伴師老蒼蒼

再賦三首

堂堂李杜壇誰敢躡其址先生坐壇上持鉞令餘子由  
來文字伯不但表奏偉高懷淡無嗜寓興或留此平生  
上林手避謗淹二始登臨意超然筆落風雨似事異柳  
司馬辛苦記山水樂哉邦無事那待猛政理駕言尉吾  
民不愧城門軌看山笑鄒湛句外寄深旨岩樹閱幾容  
尚餘堯時體

宗栢登山詩長松列  
靖肅下擬堯時體

撫板歌公詩未暇知

餘事

興公賦天台千字一何少峴山逢巧匠籠絡六詩了餘  
情到娘子心動雲縹緲髣髴山河人薜荔一身繞殷勤  
供泚筆路轉得龍沼應龍喜公來噓氣紛霧杳忽然張  
蓋起知不受人擾

山有龍沼鄉人語曰峴山張蓋雨  
霧霈事出山水小牘霧杳出文選

詩

成中有畫幽情雜荒窈從公雖一快顧有和詩撓是時  
姑置之歸路迷日表安得永茲樂彭鏗尚為天但愁歸  
城中念山令人老

脩眉入幽夢起費西南望

城中望山  
正在西南

終願學柳文買泉

築愚堂錯磨高壁翠日日在我旁忽在新野鄒行從泰  
山羊城中瞻使君駕鶴高馳翔詩成墮人世字字含風  
霜平生仰止勤不但上下床顧許俗士駕平叅文人行  
封姨豈嗔予震怒挾阿香知公終可恃不記當趣裝清  
歡豈有極夜色來蒼蒼

秋月

袞暑推不去快風喜來過西榮遲明月與子聊婆娑初

如金盤湧稍若玉鑑磨亭亭倚華魄艷艷舒凍波夜氣  
清入骨奈此光景何一杯幸相屬安能廢吟哦纖阿無  
停輪衰鬢馳已多及時會行樂無惜醉顏酡

初至邵陽逢入桂林使以書問其地之安危

湖北彌年所長沙費月餘初為邵陽夢又作桂林書老  
矣身安用飄然計本疎管寧遼海上何得便安居

均臺詞二首

小臺惜春春已來平分和氣入均臺夜來臺邊草環綠

今朝芒生滿三木  
堦頭拍手闌千兒  
齊唱中和宣布曲  
使君坐嘯聞如雲  
請釀百川壽使君  
但願使君長樂職  
不須更看杓虛寔

東家西家爾闕來聽說空囿如春臺  
決曹高卧印生綠

叢棘化為交遜木  
策勲此木那可遺  
動地風搖枝不曲  
願我無訟到來雲  
莫辭著力借冠君  
借得賢侯雖爾職  
但恐朝廷要人調  
鼎寔

長沙寺桂花重開

天遣幽花兩度開  
黃昏梵放此徘徊  
不教居士卧禪榻  
喚出西廂共看來

和若拙弟得陪游後園

西園冠蓋坐生風  
更欲長繩繫六龍  
惟有病夫能省事  
北窗三友是過從

壯夫三箭功名手  
儒士百篇藜莧腸  
莫道人人握珠玉  
應須字字挾風霜

季高送酒



自接麴生蓬戶外便呼伯雅竹牀頭真逢幼婦著黃絹  
直遣從事到青州

欲入州不果

當復入州寬作期人間踏地有安危風流丘壑真吾事  
籌策廟堂非所知白水春陂天淡淡蒼峰晴雪錦離離  
恰逢居士身輕日正是山中多景時

墨戲

鄂州遷客一花說仇池老仙五字銘併入晴窗三昧手

不須辛苦讀騷經

右蘭

又

人間風露不到曉只有酪奴無世塵何須更待秋風至  
蕭艾從來不共春

右蕙

和孫升之

姪國餘芳代有人于今公子秀溪濱處心如水尚書市  
能賦臨流靖節君花島紅雲春句麗月梅疎影夜香聞  
囊開古錦湖山出何意一星窺妙文

寺居

招提遠占一牛鳴，阻絕干戈得暫經。  
夢境了知非有實，醉鄉不入自常醒。  
樓臺近水涵明鑑，草樹連空寫素屏。  
物象自堪供客眼，未須覓句戶長扃。

某竊慕東坡以鐵拄杖為樂，全生日之壽。今以大銅餅上判府待制庶幾因物以露區區，且作詩二首將之，亦東坡故事。

要學東坡壽樂全，此瓶端合供儒先。  
鐵如意畔無憂畏。

玉唾壺傍耐歲年項似董宣真是強腹如邊孝故應便  
與公剝貯為霖水不羨宮門承露仙

不與觀音伴柳枝要令奇相解公願會逢白氏編書日  
猶夢陶家貯粟時安用作盤供軟血也勝為鉢困催詩  
千年秀結重重綠長映先生鬢與眉

又用韻春雪

急雪催詩興未闌東風肯奈烏烏寒最憐度牒勤勤意  
更接飛花細細看連夜拋回三白瑞及時驚動五辛盤

袁安久絕千人望春破還思綺一端

次韻邢子友

壯士如今爛莫收尚思抽矢射旄頭不堪苦霧侵衰鬢  
稍喜和烟入戍樓萬里中原空費夢三春勝日偶成遊  
青松遠嶺偏驚眼薄晚闌干更少留

某用家弟韻賦絕句上浼清視蕪詞累句非敢  
以為詩也願賜一言卒相之

萬里平生幾蛇足九州何路不羊腸只因綠士蒼官輩

却解從公到雪霜

某以雨有嘉應遂占有秋輒採用家弟韻賦二

絕句少貲勤卹之誠也

雲氣初看龍起湫雨聲旋聽樹驚秋已教農父歌田守

更遣虞人信魏侯

某比蒙宿戒遊富家池明日微雨猶不廢出故有是句

紀德刊碑不厭豐龍眠深洞一言通坐看綠浪搖千里

拔薤栽榆未當功

梅

愛歌纖影上窗紗無限輕香夜遶家  
一陣東風濕殘雪  
強將嬌淚學梨花

蒙知府寵示秋日郡圃佳製遂侍杖履逍遙林  
水間輒次韻四篇上瀆台覽

歲月移文外乾坤杖履中鏗然五字律

一作句

健在百夫

雄秋入池深碧寒欺葉遞紅此間兼吏隱端不減游嵩

鳥語知公樂晴山及我遊盡排物外事拚作酒中浮菊  
蕊離雙鬢林聲隱四愁騷人例喜賦政自不關秋

竹際笙簧起回聽衆籟微時陪物外賞肯念日斜歸草  
色違秋意池光淨客衣吟公清絕句政爾不能肥

一笑聊開口千憂不上眉林深受風得栢老到霜知小  
憇逢筠洞幽尋及枳籬願公勤秉燭裁詠棗離離

送人歸京師

門外子規啼未休山村日落夢悠悠故園便是無兵馬  
猶有歸時一段愁

雪



仙人手持白鸞尾夜半朝元明月裏羽衣三振風不斷  
下視銀潢一千里玉軼載花分後前欲落未落天恍然  
餘標從向人間去乞與袁安破曉眠

賦康平老銅雀硯

鄴城臺殿已荒涼依舊山河滿夕陽瓦礫却鑱今日硯  
似教人世寫興亡

和顏持約

半篙寒碧秋垂釣一笛西風夜倚樓多少巫山舊家事

老來分付水東流

早行

露侵駝褐曉寒輕  
星斗闌干分外明  
寂寞小橋和夢過  
稻田深處野蟲鳴

海棠

春雨夜有聲  
連林杏花落  
海棠已復動  
寒食豈寂寞  
人間有此麗  
赴我隔年約  
花葉兩分明  
春陰耿簾幙  
東風吹不斷  
日暮羽指薄  
何可無我吟  
三斗恨詩惡

寄題平康老丐柯亭

高懷志丘壑既足不願餘惜哉三徑荒滯彼天一隅小  
築聊自適空園闢榛蕪清影弔高槐氣與西山居何以  
開子顏庭柯作森疎月露洗塵翳天風吹笙竽方其寓  
目時萬象供嘯呼終然成坐忘天地猶空虛券外果何  
言浮雲只須臾乃知鐘鼎豐未勝山林癯淵明死千年  
日月走名譽不肯見督郵歸來守舊廬可憐骨已朽後  
有誰斷渠願子副名實此事吾欲書

余識景純家弟出其詩見示喜其同臭味也輒  
用大成黃字韻賦八句贈之

阿奴喜氣照人黃傳得新詩細作行可愛懸知似楊柳  
忘憂不復待檣柳魏收已獲催昂譽摩詰仍推相國長  
曷不少留東閣醉剩收篇詠作歸裝

次韻景純道中寄大成

聞道歌行伏李紳古來賢守是詩人久欽樂廣懷披霧  
一見司俞勝欽稟海內朗公黃閣老尊前容我白綸巾

佳篇咀嚼真堪飽此日何憂甑有塵

再蒙寵示佳什殆無遺巧勉成二章一以報佳

貺一以自貽

睨睨休嫌笏與紳如公本是九包人

來詩云還山終戴鹿皮巾讀書

只用三冬足學道從來一色醇太尉談辭揮玉麈侍中  
風韻更紗巾誰言上界多官府亦許散仙追後塵

諸公衮衮坐垂紳誰信北風欺得人遮眼讀書何用解

發顏要酒可須醇

文選醇醇發韻

十年白社空看鏡萬里青天

一岸巾少待奇章到三百試將冠蓋拂埃塵

同家弟用前韻謝判府惠酒

銜盃樂聖便稱賢無酒猶堪卧甕間使者在門催僕僕  
麴車入夢正班班不煩白水真人力來自青城道士山  
千載王弘同並美未應杞菊賦寒慳

日飲知非貧士宜要逃語穽稅心韃

楚辭心韃  
羈而不亂

所須唯

酒非虛語以醉為鄉可徑歸鸚鵡鸕鷀俱得道螟蛉螺  
贏共忘機狂言戲作麻姑送無奈閤人與我違

次韻家弟所賦

曹劉方駕信優為不廢東郊坐保釐  
投蚓問公逢老手聯珠及我媿連枝  
定知來者傾三嘆共了流年廢幾詩  
瘀絮車斜敢將去樂天那畏一微之

徙舍

南北東西共一塵得坻隨處可收身  
卜居賦就知謀拙入宅詩成覺意新  
三徑蓬蒿猶恨淺九流賓客未嫌貧  
不須更待高軒過袖有珠璣已照隣

次韻宋主簿詩

九折灣中萬斛舟怪公隨處得心休未應菊徑關心急  
聊為魚槎盡意留陸子舊踪餘馬頂羊公遺碣見龜頭  
遙知太白無多事醉裏詩成不待搜

用大成四桂坊韻詩贈令狐昆仲

鄉人洗眼看銀黃得桂連枝手尚香盛事固應傳雁塔  
新詩不減住雞坊醅酥乳酪原同味羯末封胡更合堂  
從此葛恢門下客知名可但一揚方



留別葛汝州

平生師友塵莫數兩眼偏明向公許  
一時盛德人中驥四海知名地上虎  
東序階墀再鞞板西州杖履三寒暑  
我方庶兄湯惠休公乃小兒楊德祖  
未頒還朝尺一語不愧專城丈二組  
為公剝買銀管筆容我時親玉柄塵

近蒙五字落珠璣

杜牧之詩云  
五字落珠璣

如服一丸生翅羽別離

真成惜夜燭感嘆更值歌朝雨  
行看入侍玉皇案與進不待金剛杵  
勸公慎勿學孔光薦士何妨似張禹

孔光  
傳弟

子見光居大位幾得其助光終一無所薦其公如此張  
禹傳禹成就弟子尤著者淮陽彭宣至大司空沛郡戴  
崇至少  
府九卿

蒙賜佳什欽歎不足不揆淺陋輒次元韻

退之高文仰東岱籍湜傳盟其足賴固知法嗣要龍象  
先生端是毗陵派方駕曹劉蓋餘力壓倒元白聊一快  
向來班門收衆材賓履費公珠璣琲三熏會有堪此事  
羣犬未免驚所怪但知樓仰百尺顛豈覺波涵千頃外  
南州短簿令公喜巍巍我冠陸離佩有如若士那可無

筆勢已超聲律界相將問道留十日滿座真成折床會  
清詩忽復墮華牋要使握瑜誇等輩

某蒙示詠家弟所撰班史屬辭長句三歎之餘  
輒用元韻以示家弟謹布師席

雋永雜俎雖甚旨何似三冬足文史義子皮裏西京書  
議論逼人驚疊疊戲為語韻網所遺人皆百能子千之  
雖非張巡徧記誦豈與李翰爭毫釐不待區區隸古定  
便令景宗知競病掇要虛煩四十篇三卷之博能擬聖

儒林文人摘藻春作詩印可融心神我不從今悔迂學  
不須更辨瓚稱臣

蒙再示屬辭三嘆之餘讚巨麗無地托言輒依  
元韻再成一章非獨助家弟致謝區區少裨  
之使進學焉亦師席善誘之意也

書如嘉肴要知旨區區太冲空詠史百年能挂幾牛角  
火急編摩時疊疊柳家文類今無遺可忍行事空違之  
此書真是羣玉府事辭所不遺毫釐子不見劉勰書成

要人定豈但令人愈頭病偏向車前問沈公果符夢裏  
隨先聖兩詩入手喜生春從今護持知有神便可繕寫  
持獻御注解不須煩五臣

昨日侍巾鉢飯于天寧蒙佳什謹次韵

朱門未知禪脫義富不期奢奢自至二韭雖寒故是公  
萬羊賈禍徒封衛我公居塵不染塵便隨一鉢遺甘辛  
出家雖非將相事食菜要是英雄人臞儒一生用心苦  
何曾夢見難映黍中丞惜福幸見分晚食從公當羔豎

崔趙公問徑山曰弟子出家得否荅曰出家是大丈夫  
事將相所為出李肇國史補洪州廬使問一禪師曰弟  
子吃酒肉即是不吃酒肉即是荅  
曰若吃是中丞祿不吃是中丞福

蒙再示佳什不敢虛厚賜謹再用韻

先生明經今蔡義念佛仍師大勢至

大勢至王子曰我  
本因地以念佛心

入無  
生地

食菜不待周顒書要斷貪殺兼自衛顏回平生捨

隨塵蓼蟲食蓼忘其辛先生種福我無禍成佛定是同  
功人兩詩見戒言甚苦肯賦黃雞啄秋黍從今但見懶  
殘芋不敢求嘗鑒虛矜

承知府待制誕生之辰輒廣善懷菩薩故事成  
古詩一首仰惟經世之外深入佛海而某欲  
托辭以寄款款適獲此事發寤於心似非偶  
然者獨荒陋不足以侈此殊慶耳

歲星欲吐芒不開昴星避此光低徊麒麟鸞鸞紛夾侍  
善懷菩薩當重來仙公風流今幾歲再託高門瑞當世  
買香趁浴驚衆聾要識此僧今我是金粟後身何足言  
釋迦親送非虛傳稽首西來大菩薩住世小劫須千年

宰官說法聊應會餘事文章亦三昧世間底物堪壽公

本是金剛無可壞

葛仙公起居注云于時在葛尚書家尚書時八十始有此子時忽有沙門

自稱天竺僧于市大買香市怪問僧曰昨夜夢善思菩薩生葛尚書家將以香浴之到生時僧至燒香右繞三匝禮拜恭敬沐浴而止靈寶法輪經云葛仙公生始數日有外國沙門見仙翁禮拜抱持而告仙公父母曰此是西方善思菩薩今來漢地教化衆生

### 遊紫邏洞

我不願封萬戶侯願向紫邏從公游鄆州溪堂號州洞  
未有退之詩可留水近山流清澈底竹飽千霜節如此



廊廟之具千金軀底事便著山岩裏清鞭挂壁一事無  
環珮聲中了朝晡祝融不到林深處客至五月懷貂狐  
狗華大夫無此樂從渠遮山用翠幙若問此間奇絕處  
但道胸中有丘壑

研銘

無住菴老居士紫玉池娛晚歲不出菴書誦偈誰使之  
踐朝市入承明司帝制如胥井久不治百尺泉來莫冀  
古之人輕百計惟出處不敢易嗟已晚覺非是勒斯銘

戒後世

願軒記

余客汝州識治獄掾陳德潤與之語肺腑無溪壑也奔走百僚之底未嘗一日有怠容後官太學而其弟道醇肄業焉官學萬里貧不振天子幸學官之澹然不色喜余以是愧其兄弟道醇間語曰我又有隱居不稼之兄廬西山之下其燕居所榜之曰願軒前崖岫之崑崙後礧壑之琮琤煙雲草木晦明寒暑出天地之奇變以

娛軒中之人世之得喪利害無所經其懷我與汝州掾  
心不能忘也余面贊之曰鍾皓有兄不仕皓亦逡巡難  
進居官有聞何黜棲遁求志而其子弟遺進退之節後  
世莫訾焉而今而後知二子之師友不在他在願軒爾  
于其歸也申以告之曰大丈夫用世非難也無媿子願  
軒之兄為難也其亦告子願軒之兄不仕非難也行義  
風烈有聞于鄉里無媿乎前之山後之澗為難也古之  
君子居也其仕也其道一也而已二子方將為軒冕所

縻異日風績振耀而用舍行藏可觀可紀則願軒之進德亦可占矣道醇曰是蓋願軒之紀盍書之乃錄大畧使歸書之其壁且以告德潤云洛陽陳去非記

跋郭節度父墓誌銘

自古將帥之世其功名福祚鮮有克全至漢辛武賢父子始傳世為名將史氏賢之又發于序傳榮華至今本朝郭氏乃有累世之美勲業書于竹帛闕閱耀于一時至殿帥益顯遂以宿將用也不見其形願察其影其受



社若此則其所行可知矣夫當領以規者同郡之至情也天下方有難非血誠壯烈不足以解國家憂殷帥勉之亦以告意氣之同者

以玉剛卯為向伯共生朝贊

仲冬吉日風穆氣休我出剛卯以壽元侯祝融之玉真此離方元侯佩之如玉之剛攘除厲凶以迎明王南門不鍵有室則強三肅元侯既贈既禱曷其報我當以剛

卯

甘泉吾使君畫史作簡齋居士像居士見之大  
笑如洞山過水覩影時也戲書三十二字

兩眉軒昂像無寄而服如此又不離世鑑中壁上處處  
皆是簡齋雖傳文殊無二

書堂石室銘

巍巍仁祖軼堯邁禹揆厥所因中外有人有列周公聰  
明正直推原厥本功在石室仁祖在天公在列星石室  
在茲公寔臨之咨爾山鬼護而勿失咨爾裔孫肅茲草

欽定四庫全書

簡齋集  
卷十五

木後有興者無愧茲石

簡齋集卷十五

謹案卷十二第四頁後二行甘泉坊裏林影黑原  
本坊訛方黑訛異據別本改

第九頁前六行今年懶作文原本闕今字據別本  
補

卷十三第四頁後四行幸無公家責原本責訛貴  
據宋詩鈔改

第八頁前二行何似茅山陶隱居原本居訛君據  
別本及晉書改



卷十五第一頁後四行試將能事迫原本能訛誰  
據宋詩鈔改

第二頁前四行不數驚鳥百原本數訛敢據別本  
改


第七頁前一行稍若玉鑑磨原本鑑訛劒據別本  
改

第十二頁前四行小憇逢筠洞原本逢訛違據宋  
詩鈔改

第二十頁後二行祝融不到林深處客至五月懷  
貂狐原本林深訛深林狐訛裘據別本改

欽定四庫全書





總校官庶吉士臣張能照

校對官庶吉士臣陳墉

滕錄監生臣吳魯